

Ina deschina d'acziuns a favur dal clima

(rtr/fmr) Sut la batgetta da l'organisaziun «Chauma dal clima» da sindicats sco era da autras organisaziuns hai dà venderdi passà var 75 acziuns a favur dal clima en l'entira Svizra – al «Strike for future». Var 10 acziuns èn er stadas en il Grischun, la pli gronda a Cuir. Cun divers stans han activistas ed activists pretendì mesiras ed activitads en la politica ed en la societad per crear in avegnir ecologic, persistent e gist.

Las acziuns han tanschì d'in simpel stan d'informaziun, sur lavuratori, fin tar spassegiadas, turas da velo, concerts e demonstraziuns. Sin l'Alexanderplatz a Cuir, e silsunter en las giassas da la citad, hai dà la fin dal di d'acziun ina demonstraziun. Tenor stimaziun èn pliras tschient personas sa participadas a quella demonstraziun.

Ina giuvna grischuna che cumbatta davantvart per il clima è la gimnasiasta da 17 onns, *Silja Largiadèr*. Tenor ella èsi impurtant da render attent la politica ch'i na saja betg tschintg, mabain ina minuta avant las dudesch, pia nairas uras da far insatge. Quai sa mussia adina puspè er en divers studis. I dovria uss ina midada dal pensar. Per la giuvna activista è la furma da demonstrar actualmain l'unica pussaivladad per render attent a lur quitads.